



官常典第七百四十二卷

忠烈部名臣列傳三十七

明八 單陳表

按彰德府志陳表嘉靖間賊上師召謀叛陳表以承差賈檄赴留議滅標兵糧衆軍鼓譟剽掠城市陳表大罵曰我良民豈從爾賊反乎且爾釜魚耳旬日大兵集無噍類矣賊怒碎其屍妻李氏年十九收骸骨歸葬每哭輒痛絕撫遺孤守節終身紡績以給朝夕曰吾必不負吾夫也巡撫旌其門曰忠節

畢文

按山西通志文遊擊將軍太原衛指揮以事下獄嘉靖間巡撫葛議滅標兵糧衆軍鼓譟剽掠城市焚劫公府欲推文爲長撞闥門露刃羅拜曰某等計出無聊願戴將軍文怒罵不從且諭以大義賊遂剽以刃遇害少司馬萬恭撫晉知其事檄下有司建忠義祠於北門甕城外後勅建忠節坊

康良臣

按黃州府志良臣嘉靖間以掾尉定海率義兵與倭戰斬首三十餘級竟受重創殞馬上手戈尙未釋事聞廕一子入監

楊忠惠

按雲南通志忠惠和曲人寄學雲南府嘉靖間鳳繼祖叛軍門議招降賊營以散其黨無敢前者忠惠奮義請行賊執之忠惠不屈以蠻語罵賊賊怒殺之死甚激烈

趙愷

按雲南通志愷尋甸人性行誠朴爲鄉里所重嘉靖間安銓叛攻城愷率衆拒之力不能支爲賊所執以刀加頸欲脅之從愷給曰待率家眷相從賊信釋之愷至家集衆泣曰今賊勢猖獗人民殺戮給盡吾惟有死而已我死汝等舉火焚屋毋致我屍骸暴露遂自縊死闔家自焚幼男景新年甫十歲以他出得免知府劉槐卽屋址築垣爲趙氏祠墓撰文往祭知府魏濟以詩輓之

楊順生

按永寧縣志順生四保人張容靖家僕嘉靖間湖寇王矮子百餘人劫掠容靖家縛容靖夫婦于庭

桂衆僕皆散順生矚賊抄財內室操刀直入解縛負馳出門容靖夫婦得脫走賊見蜂擁急追順生挺立塘塍罵曰我在此汝何往與賊交鋒砍賊首身亦彼數槍因失足魚池遂被殺

蕭曰金 蕭曜 蕭曉

按永寧縣志蕭曰金蕭曜蕭曉四保人嘉靖間湖寇王矮子出劫勢甚猖獗三蕭素以義勇自負不俟召募自集數十輩爲一哨直抵賊營戰數陣折賊數槍格殺數賊賊見鋒銳敗走蕭追之因山路崎險失足而蹶且從兵後至遂遇害旣死猶怒目張拳若敵賊狀府縣聞其事爲文遣官致祭立祠於礮頭濱江扁曰義勇

陶璽

按山西通志璽威海衛人嘉靖間永寧州判年饑盜起流劫汾嵐石隰諸郡邑璽率衆迎敵身先士卒追至黑暗嶺賊夾伏兩山下死戰力竭遇害事聞贈知州錄次子傳入監讀書

黃元謙

按南安縣志元謙嘉靖間永春呂尙四南安陳子洪等剽掠鄉社有赤鬚兒者元謙從弟也往從之

元謙伺其歸執之會族告祖責以大義投之水中已而斂之曰從賊當死吾弟可鑒也子洪擁衆至執元謙網致壘中露刃刳之元謙瞋目曰寧死肯從賊乎子洪怒亦投水中

張澤

按安慶府志澤字大被幼穎異七歲授論語至事父母竭力事君致身喟然曰忠孝當如是以選貢計偕授沅江令擢衢州別駕時督府胡宗憲威傾兩浙其前驅求索無厭二千石以下唯唯澤縛而杖之欲解綬去胡留待以賓禮戒部人曰而不知此有廉吏乎供具減十之五有礦寇擾處澤單騎諭以威福給米數石爲歸餉寇退戒無入衢尋擢廣安知州一日決淹獄五十出十餘年之寃於獄者黃明義等五十餘人入計自治騶不以煩民爲天下廉吏最特擢僉事雲南去家萬里兩僮自隨分巡安普委印繫繫者七益勵精不遑食鳳繼祖者武定之屬夷攻其嫂奪印遂拒命中丞直指議討之澤曰小醜而動大衆不武不得其死不威授我千金師一旅不旬月可立擒而獻之麾下不聽使澤監夷軍百前發澤嘆曰我欲萬全而當道疑我怯耶遂往一戰而勝追之戰復勝賊走渡河澤麾衆前半渡伏起執之居賊寨衣冠危坐時讓以大義賊置酒獻千金爲壽願得手書移軍門乞赦

澤叱曰天朝大臣寧爲賊作說客耶賊曰不書則有刃耳曰刃安能怵我遂死之事聞贈光祿寺少卿賜廟曰忠節廕一子

莫任

按福建通志任蒼梧人嘉靖間永定典史蒞官勤勞以逐賊力戰死

汪一中 劉芳

按明外史忠義傳一中字正叔歙人嘉靖二十三年進士由開封推官屢遷江西副使四十年鄰境賊入寇薄泰和一中方譙投箸起曰賊鼓行西掩我不備民無噍類豈飲酒時乎遂罷會居無何當路以討賊屬之先是泰和巡檢劉芳力戰死賊怒磔其尸一中至率請將吏祭曰爾職抱關猶死疆事吾待罪方面不滅賊何以生爲遂誓師列陣鼓之俘五人斬首以徇旦日陣如前會賊至左右軍皆潰賊悉赴中軍中軍潰一中躍馬當賊鋒殺三人脰脅中創二臂中刃三與指揮王應鵬千戶唐鼎皆死之贈光祿卿諡忠愍卹典如制妻程投井未死送一中喪不食五日竟死

王應鵬 陳策 馮鎧

按吉安府志應鵬吉安所指揮僉事嘉靖辛酉嶺南賊起掠泰和應鵬與百戶陳策領兵禦賊右哨稍卻應鵬策死之事聞立祠祀之加陞應鵬子指揮同知策無嗣時有馮鎧者安福洞背人提民兵禦寇奮勇當先殺數賊力盡爲賊所殺當道表其門曰義勇

唐鼎

按紹興府志鼎永新守禦所千戶爲人篤慎辛酉之亂巡守檄鼎從征至泰和冠朝里力戰矢盡爲賊所害巡按御史奏聞贈官陞廕二級立廟死所祀之

趙旻

按福建通志旻政和人以貢授蘭溪教年老解組督學再留講學受業湛甘泉門壬戌倭犯境被執不屈死

柯有年

按徐聞縣志有年邑人教諭懋之子補邑庠生性慷慨尙氣節嘉靖四十年海寇劫村甚急有年語兄扶父懋出走以身禦敵而死賊退村賴以保鄉人立祠祀之旌曰忠勇

徐九經 周尙友

按福建通志九經江西貴溪人嘉靖四十一年授政和縣丞壬戌倭寇圍城與知縣周尙友堅守援絕城陷同死

汪蘭

按廣信府志蘭字子芳玉山人由歲貢授開化訓致仕居家以節義自勵嘗曰吾先公素以節義著當思繼之無愧前人迨嘉靖辛酉廣信兵袁三從浙駐玉蘭窺其將作亂就邑令謀之曰禍急矣盍亟圖諸令曰是何能爲乃退而嘆曰吾聞之卿大夫不能謀也將奈何方私謀爲守禦計是夜賊卒起令逃去蘭曰事不可爲矣與坐觀變不若往諭之以理或可小殺其屠戮之慘乃衣冠迎謂之曰若等爲此意豈不有所欲乎顧旦暮且擒徒以其軀資犬豕腹何益哉卽得志不免名賊及茲遂戢可轉禍爲福也賊聞有悟者曰公言良是顧業已嘯聚勢不可已公長者宜爲我謀迫之行蘭正色曰死卽死耳吾豈從反乎罵不絕口賊殺之三日始殯其英氣勃勃若生邑之士民咸服其見之先而惜其死之烈都憲署其閭曰侃侃正氣仍檄祀鄉賢

李堯卿

按番禺縣志堯卿字唐馮番禺人自幼卓犖負大志登嘉靖癸卯鄉薦丙辰授寧德令百廢具舉惠政大行民甚德之頻年以來倭寇不靖堯卿乃先事戒嚴聚糧修城濬池練兵飭器無何倭寇果擁衆萬餘入寇堯卿提戈被戎身先士卒倭知有備解圍而去歲辛酉倭寇復至繞城三面攻數日堯卿仗劍督戰大小凡數十戰城中力竭兵疲外援不至倭攻城益急堯卿度勢萬不能支遂解印付家童城陷堯卿猶揮劍斬倭頭數十竟死之事聞贈太僕寺丞廕子翁齡爲國學生

林爾張

按潮州府志爾張字四維惠來人父應選韶州訓導爾張甲申歲貢授天柱知縣陞桂陽知州調靖州皆在湖南多難之地以才幹聞靖爲滇寇所困守禦二月不懈援絕城陷嘗賊不屈死一家殉節十餘人民立祠祀之

朱幾

按番禺縣志嘉靖間吳平入寇詔安令梁士楚遣朱幾將官軍擊之被執不屈死

孫商偉

按富陽縣志商偉嘉靖癸丑歲貢授福建寧德教諭守官課士確有成規四十年十月閩廣流寇自邵武轉掠犯寧德以有備遁去又明年二月倭破平海自福寧襲寧德陷焉參將王夢麟戰歿知縣李堯卿被殺倭寇入學宮挾商偉行商偉曰我學官也職死學中去此一步非死所矣遂死夫子像幕前邑諸生陳請于總制胡宗憲具題卽行福建寧德入名宦祠浙江富陽祀鄉賢祠諡曰忠烈

林國幹

按平遠縣志國幹大柘人少有膽略嘉靖四十二年總兵俞大猷往程鄉勦藍松山賊遣入賊巢賊將留之國幹不從賊曰不服將烹汝國幹厲聲曰吾豈從汝賊耶遂遇害

珠長三

按廣州府志珠長三東莞人嘉靖間巨寇曾一本至珠長三擁衆提鎗力與賊拒死之賊遂退去

蕭承命 王詵

按臨江府志承命字惟甫清江人由臬司掾嘉靖四十四年任廣東東莞縣典史方五月寇流劫村

落會追城承命督兵拒敵直抵七都山下矢力血戰賊多兵寡與百戶王誅死之月餘始得殮其骨以歸旅櫬蕭然軍門吳都御史義而憫之上其事

徐堯臣

按保德州志堯臣所百戶嘉靖四十五年十一月領兵于唐家會龍王廟前打冰寇衆踏冰入犯堯臣拒堵力戰面中五矢刀傷七處遂沒於陣事聞卹錄加贈副千戶

徐樾

按廣信府志樾字子直貴溪人少潛心聖道不求應舉聞王陽明過貴溪走百里謁之舟中得聞良知語豁然解悟年三十始就試登嘉靖進士卒業於王心齋嘗語人天機無假舜居深山尹耕有莘何所從學所謂學者學乎我而已王心齋稱其用功精密深徹一貫之旨仕禮曹七年無日不與湛甘泉歐南塾黃文菴呂涇野諸君子相討論四方從遊者戶外之履滿焉擢閩參議值海寇作亂樾單騎入穴譬以禍福卽散去督學貴州先德行而後文藝疏增雲貴解額累官雲南方伯雖簿書盈案稍暇卽與諸生講學會朝廷議誅土酋那鑑經年不決樾忠義憤激與都御史石簡同謀遂自請

兵以往遭奸臣李維通賊洩謀被困死之時雲霾雨泣天色重昏者六日官民慟哭者萬有餘人清平孫郡守爲治喪檢行李僅有十八金海內聞而痛之直指趙炳然上其狀詔贈光祿寺卿予葬祭

張惠

按龍游縣志惠景泰初除龍游令性篤實寡嗜欲治行卓然括寇大亂勢莫可禦會以暴逼境上官佐貳議棄縣去惠獨召衆誓曰賊至而走朝廷何以命官爲惠當與城俱死矣民至今能稱其事

陳大禮

按惠州府志大禮永安柏埔人嘗爲布政司掾嘉靖末賊起棄歸築壘積粟散家財訓練什伍捍保鄉里賊戒毋犯老陳神江一路多保全者兵備道檄大禮帥鄉兵同千戶湯勳討曾廷鳳戰於黃沙官兵却大禮奮罵曰公等無鄉里妻子之念欺朝廷空糜廩食全軀固當大禮敢愛生損威辱國力戰死之督府賜金祭葬立祠祀焉

蕭懋烈

子舞鳳

按福建通志懋烈歸化人任鳳陽照磨流寇突入懋烈提兵奮擊乏援被執死之子舞鳳同日死焉

李嘉言

按福建通志嘉言上杭諸生嘉靖季山寇李占春既降復鼓衆謀反嘉言應命往撫爲賊所脅罵賊死人至今義之

陳璉

按新會縣志璉字濟美新會人由歲貢選永平府推官爲張英國公所知薦移安南新安府推官會叛寇楊恭僭稱王官軍追至新安峽山縣璉率杜布等設伏擒之功爲人掩黎利父子復鷗張成山侯王通敗績擅傳檄以清化迤南城池與利所屬官吏悉令出城璉忿通所爲殉王事以死其家書云賊滅則還家有日賊在則歸國無期故不與王通等同還而忠烈凜凜可悲也夫英國公輓詩云漢庭決策棄珠崖歸國衣冠渡五潛獨惜匪躬陳郡理郊原誰爲掩遺骸

王何

按會同縣志何本縣人賊入寇縣官被擄何聞之奮勇與敵脫縣官於難而何喪首尙提戈勒馬歸家婦聞其馬嘶出迎始墮縣官行祭立石表其宅曰義士死後神赫尸祝禱應每夜空中隱隱有車

馬聲鄉人呼爲踏浪公今子孫多衣冠之倫咸以爲忠義之報云

黃正 子琰

按碭山縣志正字惟中氣質剛方爲人孝友爲邑吏時求直言奏對稱旨擢御史糾劾不避權勢忤旨黜爲英山吏會金山叛賊猖獗求能討賊者或以正子琰聞徵琰至上問曰有平賊方略對曰臣年幼才弱不如臣父乃命正平賊陞左僉都御史琰以功授南京龍虎衛鎮撫未幾雲南夷叛命正往討凱旋至普安放遣麾下時普安鎮守內臣所爲不法正欲劾奏之內臣潛通夷人襲正不備琰突圍取援兵轉戰三十餘里出圍挺立而死正遂遇害琰方弱冠土人哀其忠孝勇烈立黃將軍廟祀之

李茂材

按新安縣志茂材守禦所正千戶資幹魁梧精騎射有謀略考選軍政掌印黃國相等流毒三省茂材督水兵一鼓擒之隨勦巨寇許老何亞八陳文伯王朝宣等轉征大羅山寨有功陞授指揮僉事番夷海寇江老陳亞旺等繼起茂材以次討平獲賞嘉靖四十三年兵叛茂材散家資糾集鄉兵追

古今圖書集成
七
至東莞縣大墩沙貝生擒四百餘人焚其舟餘黨悉平四十四年從征海寇吳平突陣搗巢俘馘不可勝計尋陞柘林守備隆慶元年當道徵茂材從參將魏宗潮都司王如澄追勦巨寇曾一本二將忌功屢阻其謀茂材謂家人曰吾夙有裏尸之志今償之矣命載檣車以行次雷州港督兵血戰八晝夜殺傷甚衆以失援戰死兩院交疏褒之詔世襲指揮使

張中路 孫光裕 車成 張邦化 崔桂 李正秋 劉朝瑚 王亮采 郝綸 郝珊

田成 杜本翰 甯晉封 劉靜

按永寧州志張中路孫光裕車成俱生員張邦化崔桂李正秋劉朝瑚等俱於隆慶元年被寇隨知州王亮采儒學學正郝綸訓導郝珊田成杜本翰判官甯晉封驛丞劉靜同時殉難

劉元杰

按東莞縣志元杰字廷彥東莞縣人有膂力善騎射商於杭州時值倭寇犯杭元杰慷慨自效遂率兵出戰斬首無算倭遁有劉指揮者追倭被圍元杰復單騎救出以援絕戰歿杭人立祠於北新關鐘鼓樓祀之

何蘭

按廣州府志蘭字斯馨嘉靖間襲職從征會寧巨寇攻八角臺砦生擒賊首廖四福邀欽賞推本所
千戶隆慶三年倭寇突至蘭汛守南城刁斗戒嚴四年春正月六日賊由西城襲入蘭率家丁禦之
城下揮戈鬪戰斬殺相當倭圍蘭數重血戰重創倒地賊棄蘭四散搶掠家丁何二驢負歸夜半身
死以子幼未及請卹邑人惜之

唐必治

按韶州府志必治平樂人隆慶四年尉乳源視身廉謹常自言不愛官不愛錢不愛生山寇竊發單
騎驅捕翁源大征當道檄令督勦殞於陣因爲厲白日中多有見紅袍仗劍者人知其爲唐也乃立
祠祀之

高卓

按昌化縣志卓指揮使隆慶年二陳高番等復下昌化掠英德港卓直前破敵擒殺吳德方等十七
人五年七月李茂悉衆南下兵憲史朝宜遣卓督師追之八月命卓下昌化卓以二小舟逐賊二十

古今圖書集成
八
七舟殺賊首王驄及其部百餘人卓中賊礮令麾下被己衣甲磨戰益力殺傷不計賊敗卓以創歿

張韜

按高州府志韜衛指揮僉事隆慶五年倭侵電白北門而登守者皆遁韜挺身拒之不屈而死督撫以聞於朝略曰奮身抗賊不避難以偷生厲志當兇遂捐軀而報國士論偉之

黃隆

按海康縣志隆左所副千戶隆慶五年掌錦囊所印值倭寇犯城鋒銳莫禦衆皆潰散隆獨挺身力戰而死事聞陞其子繼勳一級

許大權

按饒平縣志大權龍眼城後溝人家世業儒旁窺律數隆慶間蘇灣賊首朱良寶聞其名計賺入幕誘脅備至終不爲動慷慨自盡賊義之厚斂以歸後以子時謙貴贈文林郎勅有云盜泉不飲秉烈夫之節白刃可蹈高義士之風時人榮之

周秉唐